

六朝事迹編類卷之十

左奉議郎充江南東路安撫司幹辦軍事張敦頤養正撰

神仙門

白都山

昔白仲都常於此學道白日上昇因以為名楊修之有詩云駕鶴驂鸞自古聞策名仙籍是真君天邊舊迹無尋處滿目青山空白雲在城西南八十里西臨大江

茅君山

茅濛字初成華陽人也隱華山修道秦始皇三十年白日上昇是時先有民謠曰神仙得者茅初成駕龍上昇入太清時下玄洲戲赤城繼世而往

六朝事迹編類卷之十

在我盈始皇聞之問故老曰此仙謠也於是有尋仙之意濛之玄孫盈得道於金陵句曲山上昇為東嶽上卿司命真君太元真人居赤城時來句曲邦人改句曲為茅君山事見撫遺圖經云漢時有三茅君各乘一白鶴來居其上故號為三茅君世傳茅盈茅固茅震皆濛之後也山在句容縣東南四十里華山華陽皆在句容縣荆公有詩云一峯高出眾山巔疑隔塵沙道里千俯視烟雲來不極仰攀蘿葛去無前人間已換嘉平帝地下誰通句曲天陳迹是非分草莽紛紛流俗尚師仙

仙杏山

舊經云絕頂有杏林及仙人腳跡因以名之又有



仙壇石井故一名仙壇石山唐垂拱五年重修壇三所并石井聖曆二年縣令岑仲琢石爲像設香燈供祀之下有清泉流入丹陽湖在溧水縣東南四十三里

### 石城洞

石頭城西嶺下南臨大江有洞宛然按真誥云此小有洞天之南門也

### 華陽洞

舊經云即第八金壇大洞天也唐改爲太平觀在句容縣東南四十里茅山之側

### 仙人臺

幕府山之西有石棋盤說者云舊有仙人對奕於此故徐君平幕府山詩云仙去棋枰草自繁即此地也去城北二十五里

### 靜壇

舊經云梁侍中周捨立與道士塢相對武帝問曰其壇如何對曰風不鳴條雲無膚寸鹿巾黃帔其數甚多白簡朱衣其來罕至因名曰靜壇今按道士塢在蔣山古明慶寺前與八功德水相近則靜壇當在其處

### 春澗

鍾山宋興寺東梁處士劉訐字彥度隱居之所楊修之有詩云手拖葛屨坐藜牀竹樹蕭然一水傍枕上白雲船下月卜鄰東澗勝東岡



道士塢

蔣山明慶寺前乃陳宣帝禮元靖先生臧兢處今在寶公塔之東

華陽宮

舊經云張真人煉丹之所也梁朝陶隱居立為華陽上館唐天寶七年改今額

鷲洞宮

舊經云梁普通三年晉陵縣女子錢妙真幼年於此修行誦黃庭經積功三十年道成佩白練飛入洞中有石室醮壇存焉天寶七年奉敕於錢真人昇仙之所建宮度女道士洞在宮東一百餘步

洞元觀

輿地志云赤烏二年吳大帝為仙公葛玄造玄後白日上昇山上至今猶有壇宇楊修之有詩云葛玄功行滿三千白日驂鸞上碧天留得舊時壇宇在後人方信有神仙觀在方山下去城四十五里

青元觀

舊經云本吳朝葛仙公宅也梁天監七年建有一丹井在祠宇前去句容縣西南三百餘步

玉晨觀

句容縣東南四十五里句曲洞北門之側舊經云本晉許長史宅也昔高辛時展上公秦時巴陵侯後漢時杜廣平竝於此學道得仙梁武帝天監十三年陶弘景奏請立為朱陽館唐正觀中為紫微



國師王先生改爲華陽宮天寶七年爲玄靖先生  
改紫陽觀前有郭真人養龍池醮壇丹井俱在大  
中祥符中奉勅改今額曰玉晨觀

### 太平觀

梁書云陶弘景讀書萬餘卷善琴棋爲諸王侍讀  
永明十年脫朝服挂神武門上表辭祿詔許之於  
是止於句容之句曲山曰此是第八洞宮名金壇  
華陽之天乃立館自號華陽陶隱居唐正觀九年  
爲昇真先生改爲太平觀

### 尋仙觀

梁時所造也與芝山鷲洞相鄰上有石壇舊經云  
昔茅君行道之所唐垂拱五年道士宋文幹因石  
琢像董工修壇焉在溧水縣東南六十里

### 太虛觀

舊經云東晉時李盤白遇仙於此修道白日上昇  
山頂有會仙亭唐開元五年建大中祥符元年九  
月奉勅改今額在溧陽西南四十里盤白山下初  
名招仙觀

### 六朝事迹編類卷之十終

光祿寺署正上元李濱古漁重校刊